

遣朝官于八道搜括民丁無有脫漏以成戶籍然後次舉軍籍則事便而實得請姑停明年軍籍何如且今者原州宜寧官屬人從父役事奉承傳矣但兩邑土豪強悍成習積有年紀雖有朝命搜括之事非但守令之所不能監司亦未易下手云原州則請以有名朝士御史結銜授事目下迭使盡搜括列名成籍刻日上來宜寧則安孩已下去雖不結銜然別為下諭依右例事目下迭何如○諫院啓曰判決事韓淑昌曾為守令到處不謹請審答曰韓淑昌銓曹屢擬判決事豈偶然計乎不允○庚辰諫院啓前事不允○辛巳諫院啓前事不允○壬午諫院啓前事不允○日暈冠○癸未警邊使沈彥光啓曰臣既為警邊使明年正月間當叢去矣凡所措置之事前議已盡他餘方略規畫更與議政府兵曹同議欲面受而去耳且前例從事官或率五六員而今無可為之事故只率二員凡如摘奸審檢等事皆以軍官為之故前例或五十人或三十人今姑自望十人且前例軍官雖嘉善通政者皆得率去昌原府使許礪忠州判官邊明凡皆知平安道之事而本非可用於內地之人換差相當之職而率去如何傳曰皆如啓○諫院啓前事不允○乙酉夜東方坤方有氣如火○丙戌吏曹判書沈彥慶啓曰臣庸劣無狀無一毫補益國事